

2 Timoti

1 ¹Aya, Pol, mata nē promis od, are Kristus Jesus bun ibodok anī kilei, Negur nē oroya bunem Kristus Jesus nē aposel wō aun, ²Timoti, neu kesu oboiyau bun pas enei atotof. Tamada Negur ado neda Odug Kristus Jesus neid wau ifenēya, wau yūya ado, wau inosiya, ō bun ibodōf.

Momoiya Megeir Ifareya Nigin Wau Yaleseya Od

³Aya ō nigin, toku bō ado gaa ado, neu kosē bun karī aul fen, aya, neu talik tar age difen gen, Negur mala bun kisi karē bunem, Negur aruna aledig anī, de afiyek. ⁴Ogon maru nigin karī aul fen, ileyōya nigin wau fatuk irok, are aya wau fatuk al foug nigin age afef. ⁵Aya ogon momoiya idegēya sã anī karī aulen, momoiya anī, uruwa bun ogon tubū Lois sinã Yunis ado bun ibodon gen, aya momoi auf, are ō buneg agef ibodok. ⁶Anī nigin, Negur nē ege luwa anī kebu wo di, futu rouf nigin wederē fokō afef, Negur nē ege luwa are imau teten anon anī bunem ō bun ibodok anī. ⁷Negur ada kumī nē uur to ifanadan, anī ere, megeir nē, wau laa fiya nē ado, ada dug kulatun fiya nē uur ifanadan.

⁸Anī nigin, ō neda Odug kurō fesiya nigin ō to mama yōf, aya ī nigin kalabus bun abodok nigineg to mama yōf. Anī ere, Negur nē megeir bunem, ō aya ado bagu ta fen, biya od nigin darau talouf. ⁹Negur ī kel gei fada fen, fateul ibodōya bun iweignadan, are ada ereb taka age tafen anī bunem sã, anī ere, ī yogon wau irōya ado wau ifenēya bunem ī age fen. Wau ifenēya enei, Kristus Jesus bun tetunem fau sain gariya inoya sã mog, ifanadan. ¹⁰Anī ere, wau ifenēya anī gama neda Isennadaya, Kristus Jesus wō yen anī bunem yaoren, ī laa anī narī felen, agef fen, biya od bunem, mata ado faimud ibodkeleya anī yaor fen. ¹¹Biya od enei nigin aya soosi tamo, aposel ado ifelnēya tamo igirnan. ¹²Age fiya nigin, aya darau enei alef, anī ere, aya to mama fiyaf, ere nigin, aya aib nigin momoi aun are aya keleī, Odug nē naa anī nigin, ereb aya ī kulatun foug nigin afenen are, ī lo fiya kisi feleya are aya keleī.

¹³Ereb aya bun tamal karī won, ifelnēya biya anī, Kristus Jesus bun momoiya waū laa fiya ado, el wo dō fen, urou. ¹⁴Awa Uur Fateul ada

namedan ibodok anī nē megeir bunem, ereb ereb biya ifonon anī kulatun wo.

¹⁵ Ō keleī, Asia provins bun ganan ditornan, idi atun Figelus Hermogenes adog.

¹⁶ Odug, Onesiforus nē ibor bun wau yūya ifelnēdiyof nigin aya orouf, ere nigin, ī sain musei wau filolō fiya bunem el fiyadig, aya kokolin difiyan nigin to mama fen. ¹⁷ Ī Rom taun ibodon sain, aya nigin fatuk bagai imirnaf ile, dum fotou fiyan. ¹⁸ Odug nē wau yūya, Odug nē naa anī bun, Odug ī ifenēf nigin aya orouf! Ō keleī bagai, ī naig fe naab musei bun Efesus taun oun isennan.

2 ¹ Anī nigin, ō, neu kesu, Kristus Jesus nē wau ifenēya bun megeir uno. ² Musei meleid bun aya wogō au di, karī won anī, kariya biya tamo anidi ufelnēdiyof, ago di, idi bagam tunī ifelnēdiya kisi feleyauf. ³ Kristus Jesus nē kusī tamo biya gen, ō amā geid darau karī taul fen, tafarauf. ⁴ Kusī tamo ī tamo ege neid tobonuneid to kababal fef, ī yogon mudur ado anī wau al foug nigin orof. ⁵ Age fiya gen, gudu reya tamo ī gudu ref, ī gudu reya nē suma to dō foug are, ī uyu irouya nē teter to yalouf. ⁶ Kabī tamo kabī total yaledig ī, ketem kaū yalouf. ⁷ Aya orok anī kisi wo, Odug enei ganan nigin kisi fokō fonōf.

⁸ Jesus Kristus laa bunem kel fā yen ī, Dawid nē ibor bun tamal anī karī walauf. Enei are neu biya od, ⁹ enei nigin aya darau ale fen, mosor tamo gen kokolin difiyan. Ani ere, Negur nē od kokolin fiya sā. ¹⁰ Anī nigin, aya igrnēdin anidi nigin, ereb ereb ganan bun feseya sā afaredig, are idig isennēya Kristus Jesus bun ibodok anī, fula fiya medeīya ibodkeleya ado dalouf nigin age afedig.

¹¹ Od enei momoi bagai:

Ada ī weim gare taun ouf are,
adag ī weim mata tabodōf.

¹² Ada feseya sā tafarauf are,
adag ī weim lo fiya nē mudur tabodōf.

Ada ī nigin wa tafouf are,
īg ada nigin wa foug.

¹³ Ada to dō tafoufeg,
ī de agef dō foug,
ere nigin, ī yogo nigin wa fiya kisi feleya sā.

Kabī Tamo Negurem Ile Fen, De Yen

¹⁴ Idi ereb ereb enei nigin toku wedereid fokō wouf. Negur mala bun, od luwa irouya nigin wedereid urou, are kaū sā, are karī def anidi tadū difedidig dogol. ¹⁵ Ō Negur mala bun, kabī tamo ile fen, de youf, are kabī tamo ī yogon kabī nigin to mama foug, ī momoi od tutuk ifelnēdiya nē kabī el fe irouwauf anī, wō wouf nigin, kabī total bagai walouf. ¹⁶ Negur

sā ado kau sā nē od so wiyēf, ere nigin, idi anī bun dilelef are, fau gai momoiya sā bagai wowā douf. ¹⁷Idi neid ifelnēya kaisā bagai gedi gen iyokalauf, idi atun are Himeneus Filetus ado, ¹⁸idi momoi nē anī so difiyē diyalelen. Idi dirōdig, mata kel fāya are mogo wō yen, age de fen, tunī neid momoiya daū difef. ¹⁹Anī ere, Negur nē gariya totol ifaref, itotoya enei bun megeir fef, “Aib idi yogon are Odug i keleī,”^a ado, “Ganan idi Odug yana kurō difesif, sesen bun tamal falei douf bagai.”

²⁰Fō odug taka bun, safina ereb ereb gariya fire fire nem dinon are dibodok, tunī gol ado silwa nem, tunī aa nem ado mafer nem dinon, tunī kabī odug ifenēya nē ado tunī kabī nanaal ifenēya nē. ²¹Tamo taka ī, sesen enei bun tamal amuyē anī kulo felef are, ī fau kabī biya ifenēya nē wō youf, ī fateulouf, Marau mala bun, kabī biya yaleya kisi feleya wō ye fen, kabī biya ganan ifenēya nē wō youf nigin saika foug.

²²Oosi nē bouwa oroya sane so wiyē, ago fen, madur bagai ibodōya, momoiya, wau laa fiya ado, wau inosiya anī, aib idi waud karētut bun Odug diweignek anidi geid, dōg. ²³Neneya ado wadā keleī nē luwa irouya anī to fedē wo, ere nigin, ō keleī, are anī bunem kiwai wō yedig. ²⁴Odug nē ferfer to kusī youf bagai, age fiya ban, ī tamo kayau ganan nigin imatēya ifelnēdiyof, ifelnēdiya kisi feleyauf, to seye youf bagai. ²⁵Idi ī kiwai difenek anidi molol nem wedereid urouwauf, ago di, Negur idi waud falei fe di, idi momoi nigin keleī youf nigin wau iseya adouf. ²⁶Anī bunem, idi wedereid fokō ye fen, Satan nē kor bun tamal, in oroya dō difoug nigin Satan gei fedin anidi ditor diyawauf.

Idikeleya Naa Bun Tamo Kayau Negur Ditorōf

3 ¹Anī ere, enei keleī youf. Idikeleya naa bun, morō odug wō youf. ²Tamo kayau dogo nigin waud laa foug, moni nigin waud laa foug, yeneid dalesauf, aya aya yeya, Negur kono difoug, sineid temeid sigoreid wal difoug, disennēdi di to de difiyēdiyof, fateul to dibodōf, ³wau laa fiya sā, kiwai nigin weder tu keleya sā, taka dumen wogōya, yogo nigin kulatun fiya biya sā, nirāya, tobonunā biya nigin kiwai inoya, ⁴ne tā kiwai ifenēya, sibuya, kisim aya aya yeya, Negur nigin wau laa fiya ban bouwa nē oroya nigin wau laa fiya, ⁵bouwedim dogol Negur nē tobonunā dō dife fen, in megeir wa difoug. Idi age fediya so weid.

⁶Age fediya anidim naab dimirek dile, fō bun dile fen, kayau maleg didegneid, dogo neid kisi ulum diroukenēdidig, kayau mosor beberikā anidi, oroya sane fire fire bun waud dalesedig, ⁷kayau idi gai toku keleī daledig, anī ere, momoi anī to bagai keleīdig. ⁸Janes Jambres ado Moses kiwai difenen gen, tamo enidig momoi anī kiwai difenek, tamo anidi kisi gelele fiya ado, momoiya sā nigin itornēdin. ⁹Anī ere, idi gerō bai to

^a 2:19 Namba 16:5

dilauf, ere nigin, tamo uru age difen gen, idi neid kũ fenēya tamo kayau ganan meleid bun kaisā yaorouf.

Polem Timoti Ago Dō Woi Fiyen

¹⁰Anī ere, neu ifelnēya, neu tobonunā, neu kisi gariya, neu momoiya, sain meluk totol ifareya, wau laa fiya, feseya sã ifareya, ¹¹kafī fiya, darau, naig be fiya Antiok, Ikonium ado, Listra taun bun darau morō aya alen anī ganan ō keleī. Anī ere, Odug anī ganan bun tamal yalelnan. ¹²Momoi, tamo kayau ganan, idi Kristus Jesus bun Negur nē tobonunā dō difouf nigin orodiyouf are, idi morō dalouf. ¹³Agef mog, tamo sesen ado idegēya tamo, sane bunem sane bagai lauf, tunī didegneid mog, abag didegnēdiyof. ¹⁴Anī ere, ogo nigin, ereb ō keleī wale fen, momoi won anī toko tokō wo ule, ere nigin, idi difelnon are ō idi nigin keleī. ¹⁵Agef fen, ō simō bunem Negur nē Itotoya fateul kelein, are ō isennō di, kisi biya wale fen, Kristus Jesus nigin momoiya bunem, kel yaleyōya kisi feleyauf. ¹⁶Negur nē Itotoya ganan are Negur awa uur neseya bunem, are ifelnēya, sakāya, madur fiya ado, madur ibodōya tai fiya nigin biya. ¹⁷Age fe di, Negur nē tamo, kabī biya ganan yaleya nigin kisi feleya bagai youf.

4 ¹Negur ado, Kristus Jesus ī isi fen, in tano inouf sain bun, ī mata dibodok ado gare den anidi es fediyouf anī, idi meleid bun, aya od enei totol bagai arokonok. ²Biya od wogō wo; biya od wogōya nigin, sain biya bun ado sain sane bun dodok wo, sain meluk feseya sã ifareya ado faded fiya bunem, madur wo, totol od urokeneid, waud walesauf. ³Sain fau isiyouf bun, tamo biya od nigin to wedereid dinouf. Age fiya ban, idi dogo neid oroya dō dife fen, wederedim kariya nigin gegeī fedidig anī kari douf nigin, idegēya ifelnēdiya tamo musei gou difediyouf. ⁴Idi fau momoi anī ditor ken, wedereid fitok du ken, nenerī ege anī kari douf. ⁵Anī ere, ō ereb ereb ganan bun kisi fokō wol fen, morō faali wo, soosi kabī wale, ogon kabī ganan walel anī kisi falauf.

⁶Aya mogo wain sesewi fiya gen fi afalau fenē, agef fen, neu ileya sain mogo isil. ⁷Aya biya kusī aun, aya gudu reya mogo bure afelen, aya momoiya kafī afelen. ⁸Gama aya nigin, madur bagai nē teter dodok fe ibodok, are Odug, Es Fiya Tamo madur bagai, fau naa anī bun ifanau fenē, anī ere, aya dogol sã, idi in isiya tari difef anidig ifenēdiyof.

Pol Timoti Ī Gein Kaisā Isiyouf Nigin Irokenen

⁹Aya gein kaisā bagai usiyouf nigin kabī totol wale. ¹⁰Ere nigin, Demas ī tenebur enei nē nigin wau laa fen nigin, itorna fen, Tesalonika taun ilen. Kresen ī Galesia provins ilen, age fe di, Taitus ī Dalmesia distrik ilen. ¹¹Luk dogol aya ado mabodok. Mak wale fen, urom usig, ere nigin, ī neu kabī nigin isennaya kisi feleya. ¹²Aya Tikikus Efesus taun sur afen.

¹³Ō usiyouf sain bun, neu saket meluk Karpus nē fō bun Troas taun oun atoron anī wale urou usiyouf, neu buk kori fediya anīg urou usiyouf, anī atun neu buk kori fediya meme gabar bun itotoya nē anī to bagai utorōf.

¹⁴Aleksanda ain kabī tamo ī, aya gai kiwai total bagai ifanan. Odug fau ī ereb age fen anī nigin mala solo sane ifenēf. ¹⁵Ōg ī nigin lo welei, ere nigin, ī neda od nigin total bagai kiwai inon.

¹⁶Aya uruwa kot bun afaren sain, takam to isennan, anī ere, ganan ditornan. Anī nē mala solo to ifenēdiyof nigin aya orouf. ¹⁷Anī ere, Odug aya sirun ifar fen, megeir ifanan. Age fe di, aya bunem biya od kisi feleya bagai wogō au di, haiden ganan karī douf nigin age fen. Agef fen, aya laion awa bun tamal yalelnan. ¹⁸Odug fau kiwai sane ganan bun tamal yalelna fen, karika bagai in saa tanon irou iseleyauf. Ī bun fula fiya medeīya gai ibodkalauf. Momoi.

Idikeleya Nē Aanya

¹⁹Prisila, Akwila ado, Onesiforus nē ibor tar geid, aanya enei wenēdiyof. ²⁰Erastus Korin taun ibodon, agef mog, aya Trofimus dagi mog, Miletus taun oun atornen. ²¹Yau sain fau mog, ein kaisā usiyouf nigin kabī total wale. Yubulus, Pudens, Linus, Klodia ado momoiya turā tar ganan aanya sur difonok.

²²Odug ogon uur ado ibodōf. Wau ifenēya ā bun ibodōf.